

## **A Buk anun Paaulo karom Pilemon A pirpir kaapa muga**

Paaulo i timu a buk mi karom Pilemon. Pilemon ia raa ngaala na muaana ko ra taamaan Kolose, ma a tena nurnur kaai. Anuna raa tena pinapaam, a wilawilaau, a iaana Onesimo, i welulu paa koni. Namur di wakarabusi ma i baraata Paaulo u ra karabus. Paaulo i warawaai karomi ma i nukpuku. Baa di palaa wa Onesimo, Paaulo i nemi naa in waan talili karom anuna mukmuga Pilemon, io, i timu a buk mi karom Pilemon kupi Onesimo in loi. I wapuai naa koku i kaankaan karom Onesimo, in gaaia paai, maa mi ia nukpuku ma i nurnur un Iesu welaar ma Pilemon.

### **A winawaan i ra buk Pilemon:**

A turturpaai ra buk mi (1-3)

A koina mangamangaan anun Pilemon (4-7)

Paaulo i nemi naa Pilemon in gaaia paa Onesimo (8-22)

A tintinip na pirpir anun Paaulo karom Pilemon (23-25)

<sup>1</sup> Iaa, Paaulo, iaau karabus kabina u ra nung nurnur un Kaarisito Iesu. Mir ma Timoti a teindaat, mir timu a buk mi karom ui Pilemon, a koina tepaamiaat u ra pinapaam, <sup>2</sup> ma karom anum tabuan Aapia a teindaat, ma karom Aarkipo a tepaandaat u ra wineium ma ra Koina Wewapua, ma karom a taara na nurnur baa muaat laana waan ungaai u ra num ruma. <sup>3</sup> A

maarmaari karom ui, ma maalmaal kon God Tamaandaat, ma a Tadaaru Iesu Kaarisito.

*A maarmaari ma ra nurnur anun Pilemon*

<sup>4</sup> Baa iaau aaraaring, iaau laana nuk pa ui, ma iaau waatung wakaak karom God un ui. <sup>5</sup> Maa iaau walangoroi naa u maari a taara raap anun God, ma u nurnur u ra Tadaaru Iesu. <sup>6</sup> Iaau aaraaring naa un wapuaana anum nurnur un Kaarisito karom a taara ma un wer diat uni. Baa un paami lenmi, in waraaut ui kupi un manaana u ra kum kokoina utnaa raap anundaat baa i ki un Kaarisito. <sup>7</sup> Tenglik, baa iaau walangoroi naa u maari a taara anun God ma u wagaaia anundiat lalaun, iaau gaaia aakit, ma i wadekdek iaau kaai.

*A niaaring un Onesimo karom Pilemon*

<sup>8</sup> Raa utnaa iaau nem aakiti baa un paami. Kabina un Kaarisito, iaau laangalaanga kupi ang pirpir dekdek karom ui uni, <sup>9</sup> iaku iaau aaring wakaak ui, kabina iaau maari ui. Mi iaau aa takaana, ma iaau ki na karabus kabina u ra nung nurnur un Kaarisito Iesu, <sup>10</sup> iaau aaring paa anum nimulaaot un Onesimo, a natunglik u ra nurnur. I waan paat karom iaau baa iaau ki u ra karabus ma i nukpuku, ma mi i welaar ma natunglik mulu ut u ra nurnur. <sup>11</sup> Namuga pa i gaa kup ta pinapaam karom ui, iaku mari, ia koina tena pinapaam ma, karom ui ma karom iaau.\*

<sup>12</sup> Mi iaau tula talili wai balet ma karom ui. Baa i waan kon iaau i welaar ma raa pakaana ko ra

---

\* **1:11:** A iang Onesimo a kukuraaina baa “i topaa ut a pinapaam.”

nung lalaaun i waan ungaai mai. <sup>13</sup> Iaaun nemi naa in ki maku karom iaaun, kupi in kiaana ui Pilemon, u ra binaboura karom iaaun, baa iaaun ki u ra karabus kabina u ra Koina Wewapua. <sup>14</sup> Iaku pa iaaun nemi naa ang wowo pa ui kupi un waraaut iaaun, ui ut un paami welaar ma ra num gaai. Pang pet laar paai baa ang paam ta utnaa tuk ui ut un mulaaot. <sup>15</sup> Onesimo i ki ingen kinalik paa kon ui. Kanaapi anuna kini ingen mi i pet taai kupi mi in ki ungaai takum balet ma ui. <sup>16</sup> Mi pa in welaar balet ma ma ra wilawilaau, in welaar ma temlik mulu u ra nurnur. Iaaun maari, iaku iaaun nemi naa anum maarmaari karomi in ngaala, maa ia anum tena pinapaam ma temlik kaai u ra Tadaaru.

<sup>17</sup> Baa u nuki naa daar tepaana, io, un gaai paa balet Onesimo, welaar ma baa un gaai pa iaaun ut. <sup>18</sup> Baa ia paam taa ta aakaina karom ui ma baa ia lo paa anum ta utnaa, i koina iaaun ang baalu taai karom ui. <sup>19</sup> Iaaun Paaulo iaaun ut iaaun timu a pirpir mi ma ra limaang: ang baalu taa a dinaau maa karom ui. Pang pir ta utnaa taam, ui ut u aa nunurai naa a matakina lalaaun baa u lo paai i kabina ut un iaaun, ma i welaar ma ra dinaau karom ui. <sup>20</sup> Maia, tenglik, u ra iaa ra Tadaaru, iaaun nemi naa un wagaai paa balet Onesimo. Ui tenglik un Kaarisito, un wagaai nung lalaaun. <sup>21</sup> Baa iaaun timu a buk mi, iaaun nunura lingtatunai naa un taraam ut u ra nung niaaring karom ui, ma iaaun nunurai kaai baa un paam a utnaa in ngaala taa ra utnaa baa iaaun aaring ui uni.

<sup>22</sup> Raa utnaa kaai, iaaun aaring ui kupi un wani-

naar ta kukur ra ruma kup iaau. Iaau nurnur naa God in walaangalaanga wa iaau ko ra karabus kupi ang waan balet karom muaat. Mi ia a wai ra numuaat kum niaaring.

*A tintinip na pirpir na maarmaari*

<sup>23</sup> Epapraas ia baa i karabus ungaai ma iaau kabina u ra nurnur un Kaarisito Iesu, i taar wa anuna maarmaari karom ui. <sup>24</sup> Ma diat kaai bi, Maarko, Aaristaarko, Demaas ma Lukaa. Miaat teptepaana ungaai u ra pinapaam.

<sup>25</sup> A maarmaari anu ra Tadaaru Iesu Kaarisito in ki u ra niomuaat.

**BUK TAABU MATAKIN**  
**The New Testament in the Ramoovina Language of**  
**Papua New Guinea**  
**Nupela Testamen long tokples Ramoovina long**  
**Niugini**

copyright © 2006 Wycliffe Bible Translators, Inc.

Language: Ramoovina

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

---

PDF generated using Haiola and XeLaTeX on 11 Nov 2022 from source files dated 9 Oct 2020

d012ec6e-d199-5aa4-85c8-36d400ff7b21